

Arraunketa

SAN PEDROK ERABATEKO NAGUSITASUNA ERAKUTSI ZUEN ATZO LEKEITION

San Pedro, eta nola gainera

Inor gutxi uste zuen *Libia* horren erraz nagusituko zitzaienik atzo Ondarroa, Hondarribia, Orio eta Donibanekori. Denboraldia hasi baino ez da egin, eta azken hauen mailak gora egingo du. Baina zaila izango dute San Pedrok erakutsi duen mailara iristea.

Ramon Basaldua / Lekeitio

INOR gutxi zegoen triste —agerian behintzat— atzoko estropadaren amaieran. San Pedro arraun taldekoak ezin pozikago zeuden, jipoi ederra eman zietelako denboraldian izango dituzten aurkariak, ikurrina irabazteaz gain. Oriotarrek laugarren bukatu zuten arren, bazuten aitzakiarik irabazlearengandik 24 segundora geratu izana azaltzeko. Izan ere, Jose Luis Kortak etxean utzi zituen denboraldian titular izango diren arraunlari batzuk. Nolanahi ere, hor dago San Pedrok Oriotar sartu dion denbora. Ondarrutarrak pozik zeuden, bigarren postua eskuratu zutelako. Manzilla entrenatzailearen ustez, ostera, *Antiguako Ama*-k ez zuen estropada ona egin. Lehen kale-tik arituta —onena zen berau—, estu eta larri ibili zen bigarren postua eskuratzeko. Beste modu batean esanda, atzoko estropadak zenbait irakurketa izan ditzaie, ikuspuntuaren arabera.

Aitzakiak, titularrak, aulki mugikorra eta beste kontu guztiak alde batera utzita, gauza bat dago argi: San Pedro bere aurkariaren gainetik dagoela, nabarmen gainera. Egia da, bai, Jose Luis Kortak titular batzuk sartzeke dituela tostetan. Edozelan ere, arraunlari hauek asko hobetu beharko dute *Kanpa*-ren errendimendua San Pedroren mailara iristeko. Gainera, oriotarrek ezin dute huts egin igandean ligarako sailkatze estropadan.

Iaz Oriok sekulako maila erakutsi zuen. San Pedro, aldiz, aurreko urteetako sasoia eskuratu ezinik ibili zen. Julian Osaren iritziz, ez du inolako aldaketarik sartu aurtengo denboraldirako prestaketan, *Libia*-ren mailak gora egingo du. 1993 eta 1994ko denboraldietako San Pedroren antz handia du aurtengoak.



San Pedroko trainerua zibogako maniobra egiten atzo Lekeition.

XOUSE SIMAL

Bestalde, aipatzekoa da Donibaneko eta Santurtzik erakutsitako maila eskasa. Iaz bezala, Josetxo Arrizabalagak zuzentzen duen traineruak lan eskasa baino eskasagoa egin du Lekeition. Entrenatzaileak jakingo du inork baino hobeto nola dagoen bere koadrila, baina kanpotik ikusita behintzat, kezkatzekoa da San Pedrotik 51 segundora geratu izana. Gauza bera esan daiteke Itsasoko Ama taldearen *Sotera*-ri buruz. Traineruen ligan izango den Santurtzik azkenaurreko tokian bukatu zuen. Isuntza eta Lutxana-Bermeok, berriz, estropada polita egin zuten. Izan ere, Raspasek uste baino arazo gehiago izan zuen lehen postua eskuratzeko. X

EL CORREO-BBK Ikurrina (Lekeitio)

Taldea	1. zia.	2. zia.	3. zia.	Helmuga	Postua
lehen txanda					
Ondarroa	4.49	10.27	15.46	21.21.92	2.
Donibaneko	4.52	10.39	15.57	21.51.27	6.
Hondarribia	4.43	10.27	15.43	21.22.92	3.
San Pedro	4.39	10.17	15.23	21.00.60	1.
Orio	4.44	10.36	15.42	21.24.33	4.
bigarren txanda					
Raspas	4.58	10.41	16.00	21.50.03	5.
Zierbena	4.59	11.15	16.46	23.07.62	10.
Isuntza	4.49	10.47	16.09	22.09.13	7.
Santurtzi	4.56	11.06	16.24	22.33.68	9.
Lutxana	4.51	11.03	16.15	22.21.92	8.

Pilota

Gernikak erraz irabazi zuen Miarritzeko finala

Gernikako Mendiboure-Elizegik 35-20 menperatu zituzten Daniako Arriaga-Cuvet

Aitor Ugalde / Donostia

MIARRITZEKO Mastersak ez zuen izan merezitako amaiera. Torneoan ikusi diren partiduetatik, lehia gutxi izan zuen partidua izan zen asteazken gauean jokaturako finala. Gernikako Mendiboure eta Elizegik oso erraz menperatu zituzten Daniako Arriaga eta Cuvet, 35-20.

Elizegi oso indartsu aritu zen. Durangoko atzelariak hobera egin du txapelketak aurrera egin heinean. Eta, horrela, iaz jantzi zuen txapela berriro eraman du. Mendiboure aurrelariak oso ondo lagundu zion. Arriaga eta Cuvet monetaren beste aurpegia izan ziren. Presio handiarekin jokatu zuten, urduri, eta erraztasun handiak eman zizkieten Gernikako ordezkariak. Arriagaren

kasuan, aipatu behar da auto istripu bat izan zuela (zorionez ez berak ez berarekin zihoztenek ez dute ezer larririk) eta horrek sortutako urduritasuna nabaritu zela kantxan.

Txapelketako hirugarren eta laugarren postua erabakitze-ko partiduan Miarritzeko Etxalus-Iturrinok 25-20 irabazi zieten Milfordeko Etxabe-Rauli. Amaieran galtzaile izan zire-

nak 11-16 irabazten egon ziren.

Beloki eta Eugi berriro kantxetan • Eugi eta Beloki gaur hasiko dira berriro jokatzeko. Belokik Ordizian jokaturako du arratsaldean Capellaneekin batera Alustiza-Errandonearen aurka. Eugik Elizondon, Arretxerakin batera Retegi II-Galarzaren aurka gaur. X

Saskibaloia

Askatuak izango du lekua LEB Ligan

■ Horretarako eskatutako abala aurkeztu behar duela gogoratu du Espainiako federazioko lehendakariak

Erredakzioa / Donostia

ASKATUAK taldeak Ernesto Segura de Luna Espainiako saskibalo federazioko lehendakariaren bisita jaso zuen atzo. Berak Donostian emandako prentsurrekoan esan zuenez, Askatuak, ia ziurtasun osoz, lekua izango du LEB Ligan. Hori bai, gogoratu zuen Liga horretan jokatzeko federazioak eskatzen duen 80 milioi pezetako abala (3,2 milioi libera) aurkeztu beharko duela.

Segura de Lunak gogoratu zuen egun 11 talde daudela baldintzak bete dituztenak. Beste 3 talde daude gonbitea jaso dutenak baina baldintzak bete ez dituztenak. Horietako batek huts egiten badi, Askatuak eta Marbella dira erreserbak.

Segura de Lunak esan zuenez, abuztuaren 25era arte luzatuko da baldintzak betetzeko epea. Hasieran liga berrian 14 talde egotea aurreikusten zen, baina denek (Askatuak eta Marbella barne) betetzen badituzte baldintzak, 16 talde izango dira. X

Herri Kirolak

Pezanburu eta Dupe indartsuenak Itsasuko kanporaketan

■ Iparraldeko Txapelketaren finala abuztuaren 9an egingo da

Jon Olaskoaga / Donostia

ASTEAZKEN gauean Iparraldeko Txapelketako finalean parte hartuko duten kirolarien izenak jakin ziren. Buska biltzean Matxikote, Darguy, Suhas eta Betaeder izango dira finalean. Zakularietan bi proba egin ziren, banaka eta hiruak. Taldekako saioan Beskoitze 1 nagusitu zen. Banakako saioan Lapitz, Mendiboure, Errekart eta Eymardek lortu dute txartela.

Lasto-botatzean 4,90 metroko gutxiengo marka egin zuten bost partaidek: Arbe-noitz, Lavie, Lapitz, Errekart eta Maisonnave. Lasto altxatzean Salaberrik 17 jasoaldi egin zituen. Ingudean Etxeberrik 74 jasoaldi zenbatu zituen. Ontzi eramatean Dupek 660 metro osatu zituen. Pezanburuk eman zizkion itzuli gehien organari (4). X